

Umsögn Hundaræktarfélags Íslands um breytingar á reglugerð um innflutning hunda og katta

Hundaræktarfélag Íslands (hér eftir nefnt HRFÍ) gerir engar athugasemdir við breytingar á 2. og 5. grein reglugerðar um innflutning hunda og katta.

HRFÍ gerir hins vegar alvarlegar athugasemdir við tillögur um breytingar á 3. grein í reglugerð um innflutning hunda og katta.

Í fyrsta lagi er það varhugavert og íþyngjandi fyrir áhugafólk um hunda að banna alfarið innflutning á ákveðnum tegundum án tillits til þeirra einstaklinga sem stendur til að flytja inn. Hegðunarvandi getur komið upp innan allra tegunda en ef vandað er til verka og þekking innflytjenda á tegundunum liggur fyrir eykst flóra hundategunda á Íslandi án vandamála fyrir samfélagið. HRFÍ veltir fyrir sér hvort reglugerðin muni breytast reglulega í takt við áhuga einstaklinga á innflutningi tegunda sem MAST álítur óheppilegar.

Í öðru lagi gerir HRFÍ athugasemdir við breytingu á orðalagi að MAST geti nú bannað innflutning hunda byggt á eigin mati **án** rökstuðnings fyrir ákvörðuninni. Orðalagið: *Taka skal mið af fyrirliggjandi upplýsingum um viðkomandi hundategund, uppruna hennar og ræktunarmarkið, líkamsbyggingu og geðslag* er mjög loðið og torskilið. Telur HRFÍ að það megi skilja út frá þessari málsgrein að mat byggi eingöngu á því að skoða myndir af þeirri hundategund sem vafi er á hvort eigi að leyfa og út frá því sé tekin ákvörðun um að banna innflutning tegundarinnar, án frekar rökstuðnings. HRFÍ er mjög til efs að sérfræðipekking á hundategundum sé almennt til staðar innan vébanda MAST og telur að meta þurfi innflutning hunda, af þeim tegundum sem ekki eru hér nú þegar, ígrundað með áliti sérfræðinga á þessu sviði. MAST hlýtur að þurfa að rökstyðja bann við innflutningi tiltekinna hundategunda og gefa þeim, sem hafa löngun til að flytja inn hund, tækifæri til að rökstyðja sitt mál.

Með von um að okkar athugasemdir verði skoðaðar og teknar til greina.

Virðingarfyllst,
stjórn Hundaræktarfélags Íslands.